

# Pesaka teroka Asia Timur

-5 MAR 1991

B. Harian (M)

Oleh NORMAH HAMID

JEPUN menjadi sasaran pertama Persekutuan Silat Kebangsaan Malaysia (Pesaka) bagi mengembangkan silat di Asia Timur, apabila diundang mengadakan pertunjukan di Tokyo mulai 13 hingga 27 Mac ini.

Setiausaha Pesaka, Rahman Hassan, berkata lima pesilat yang menjuarai Kejuaraan Terbuka Malaysia kategori silat seni, Disember lalu akan menjadi deligasi pertama memperkenalkan silat di sana.

Pesilat itu ialah Mohamad Osman (seni), Azri Zainal, Anuar Ahmad (pukulan tangan kosong), Zulkarnain Awang dan Ghafar Majid (pukulan bersenjata).

Mereka akan mengadakan persembahan sempena Minggu Seni Mempertahankan Diri Tradisional Jepun dan beberapa tempat lain di bandar utama negara itu.

Katanya, Pesaka memang ada membuat rancangan untuk ke Jepun, tetapi undangan awal daripada Persatuan Seni Mempertahankan Diri Tradisional Jepun dan Nippon Budokan mempercepatkan lagi permergian ke negara itu.

"Selain mengadakan pertunjukan, saya akan membentangkan kertas kerja tentang silat dalam satu seminar dan diskusi," katanya.

Menurutnya, pada peringkat awal ini, tumpuan akan diberikan kepada silat seni bagi menarik minat rakyat Jepun. Selepas itu, silat olahraga pula menyusul.

Rahman berkata, jika silat mendapat perhatian di Jepun, bermakna bilangan negara yang akan menyertai Kejuaraan Silat Sedunia pada masa akan datang bertambah.

"Selama ini perkembangan silat hanya di Eropah yang diasaskan oleh Indonesia, sebelum Malaysia membuka perguruan di Perancis dan Denmark sejak dua tahun lalu. Kini giliran Malaysia untuk meneroka Asia Timur," katanya.

Sementara itu, Rahman berkata, Jawatankuasa Penganjur Sukan SEA Manila (Mansoc) belum lagi memberi kata putus untuk menyenaraikan silat olahraga dalam sukan terbesar di Asia Tenggara itu.



■ HABUAN KAU... Aksi seni silat olahraga.

"Saya sudah menghubungi Manila kelmarin sebagaimana yang dijanjikan. Tetapi mereka belum memberi jawapan lagi," katanya.

Pertengahan bulan lalu, rombongan Pesaka yang diketuai oleh Presidennya, Datuk Haji Muhamad Haji Muhd Taib dan Presiden Majlis Olimpik Malaysia (MOM), Tan Sri Hamzah Abu Samah, ke Manila bagi membincang masalah itu.

Datuk Haji Muhamad juga menemui Duta Malaysia di Manila, Datuk Emam Mohamad Arif Emam Mohamad Hassan, bagi membantu negara mendapat sokongan Mansoc menyenaraikan silat seperti yang dikehendaki oleh Majlis Olimpik Filipina.